

„Smy to znajmjeńša spytali“ ponučenje

wutora, 11. septembra 2018

E-PAPER: SERBSKE NOWINY 178 19

artikl hódnoćić ☆☆☆☆☆ (0)

wulkosć pisma ⊖ ⊕

f dźělać

[napisajće komentar](#)



Něhdže 60 ludźi wšěch generacijow je wčera wječor na žurłu Krawčikec hosćenca w Chrósćicach přišło. Tam su jich Inicijatiwnicy skupiny za Serbski sejm, mjez nimi Alexander Pólk (nalěwo stejo), wo swojich prócowanjach Informowall, prawje bórže serbski parlament wuzwolić. Wuwi so zajimawa a kontrowersna diskusija, wšako mějachu přitomni tójšto prašenjow. Serbski sejm ma so po woli Inicijatiwy kónc nowembra konstituować. Foto: Feliks Haza

Inicijatiwna skupina Serbski sejm diskusijny wječor přewjedła

Chrósćicy (SN/MkWj). Zajimawe a kontrowersne zarjadowanje móžachu wšitcy ói dožiwić, kotřiž su wčera wječor přeprašenje inicijatiwneje skupiny za wutworjenje Serbskeho sejma sćěhowali. Něhdže 60 ludźi je na žurłu Krawčikec hosćenca w Chrósćicach přišło, mjez nimi zastupnicy wšitkich generacijow.

Zastupnicy inicijatiwneje skupiny, kaž Njebjelčanski wjesnjanaosta Tomaš Čornak (CDU), skedźbnichu na mjeztym sydom lět trajace prócowanje skupiny, kotraž ma zaměr, serbsku rěč a kulturu dołhodobnje zaručić. Tomaš Čornak bě runje tak kaž Alexander Pólk wo tym přeswědčeny, zo su wuhlady za to óim lěpše, hdyž maja Serbja ze swojskim parlamentom awtonomiju. Potom změja woni wjetšu politisku wahu a smědža sami rozsudzić, kak móža spěchowanske srědky na dobro našeho ludu zasadzić.

Jadwiga Pjacec přitomnym rozložić, kak sej inicijatiwa wólby Serbskeho sejma praktisce předstaja: Po tym zo su hač do wčerawšeho wólbnje namjety zezběrali, ma kóždy, kiž chcył so na wólbach wobdźělić, hač do 27. oktobra skladnosć so do wolersekeje lisćiny zapisać dać, zo móht so na listowych wólbach wobdźělić. Wólby su za 3. nowember planowane. Hłosy potom pod dohledom mjezynarodnych wobkedźbowarjow wuliča. Kónc nowembra móht so nowy Serbski sejm konstituować. W nim budu zastupnicy Hornjeje a Delnjeje Łužicy paritetisce zastupjeni, Jadwiga Pjacec připowědźi.

Přitomni hosćo, mjez nimi předsyda Domowiny Dawid Statnik, bywši jednaćel Domowiny Bjarnat Cyž a předsydka serbskeje rady Sakskeje Marja Michałkowa, mějachu kopicu prašenjow. Te sahachu wot prawnskich zakładow sejma hač k prašenju, kelko wolerjow sejm trjeba, zo móht so sam jako „legitimowany“, to rěka wot serbskeho ludu woleny, wobhladować. Marja Michałkowa chcyše wědžeć, kajku rólu ma serbska rada přichodnje hrać, a Chrósćanski wjesnjanaosta Marko Kliman (CDU) bě wćipny, kotre komunalne kompetency chcył sejm přewzać. Wotmołwy sejmikarjow klinčachu stajnje jenake: Je-li sejm hakle wuzwolony, wšitko zradujemy. A dyrbjala-li so wěc nimokulić, „smy to znajmjeńša spytali“, Alexander Pólk wuzběhny. Zapóslanc Léwicy w Sakskim krajnym sejmje Hajko Kozel přirunowaše tuchwilne položenje z lětom 1848, jako běchu w Němskej přerjnu wustawu zdźěłali, bjez nazhonjenjow a njewědžo, što z toho wuroće.

Hanzo Wylem-Keł předstaji praksu w druhich krajach, hdžež su sej mjeńšiny awtonomiju wubědźili hdžež maja parlament a swojske institucije. Jako přikłady mjenowaše wón němsku mjeńšinu w Belgiskej, mjeńšiny w Finskej a němsku mjeńšinu w Madžarskej.

K rozmyslowanju pohnuť je přitomnych jedyn z hosći, kiž po zmysle rjekny: Što pomha najlěpši Serbski sejm, hdyž naši starši ze swojimi dźěćimi doma wjace serbsce njerěča?